

明

史

明史卷五

本紀五

建文

建文

建文皇帝諱允炆太祖高皇帝孫懿文太子第二子也太子元妃常氏生雄英早卒洪武十年十一月己卯繼妃呂氏生帝二十五年四月丙子太子薨九月庚寅太祖立帝爲皇太孫時年十六性聰敏仁慈篤好文學侍太子疾晝夜不暫離居喪哀毀水漿不入口者五日終三年不飲酒食肉不聽樂不御內弟允通允煙允熙俱幼躬誨導之與同寢處始太祖嘗令政事咨太子處分然後奏聞比立帝太孫帝叅決庶

政如太子時太子錄囚多所寬減至是帝乃請於太
祖曰明刑所以弼教凡事聞天倫者皆當屈法以伸
恩今所定律令惟盡法而不必原情竊所未安太祖
命改之乃更定七十三條以進太祖覽之甚悅一日
太祖有所誅違退朝怒未已帝從容進曰如得其情
哀矜勿喜是或一道也太祖爲意解常州民陳理者
繼母證其弑父獄成帝讞出之太祖命復訊乃其父
誤服熱劑暴死也因嘆曰刑不可不慎如此邈者獲
盜七人帝州擢六人者盜也其一非是訊之果
然太祖曰爾何以知之帝曰周禮斷獄首色聽向見

其人眸子瞭然必非盜賊太祖喜曰治獄貴通經信然由是中廢諸王皆叔父尊屬擁重兵並有輕帝心太祖亦以帝仁柔不類己方倚諸王藩屏於外弗之計也三十一年閏五月癸未太祖疾大漸召駙馬都尉梅殷兵部左侍郎齊泰受顧命乙酉崩遣詔傳位皇太孫止諸王入臨王國吏民一聽朝廷節制帝服喪西宮哭踊不飲勺水哀瘠骨立辛卯即位大赦天下以明年爲建文元年帝欲行三年喪禮臣請如遺詔帝曰朕非效古人諒闇不言也御朝麻冕退則衰經食以餛飩郊廟祭享如常禮遂命定儀

以進丙申詔中外五品以上及州縣官各舉所知非
其人者坐六月釋黥軍歸其鄉并天下州縣革冗員
改兵部尚書茹瑺於吏部以齊泰代之修撰黃子澄
爲太常卿召漢中教授方孝孺爲翰林侍講秋七月
周王橚子有勲告王反命曹國公李景隆執之廢爲
庶人遷之雲南八月禮部尚書鄭沂罷以雲南右布
政使陳迪代之詔興州營州開平諸衛軍全家在伍
者免一人還鄉天下衛所軍單丁者悉放爲民九月
乙酉沐春沐春總沐春軍沐春副將軍何福爲征彞將軍總其
兵冬十一月葬太祖于裕陵詔求直言舉山林才德

之士帝有疾晏朝御史澤昌隆上書諫帝曰直臣也
詔以其書廢天監五年直部侍郎張曷爲北平布政使
都指揮使謝賁掌北平都司事起前北平叅議鄭賜
爲工部尚書十二月癸卯朔始省姓於南郊右都督
沐晟嗣西平侯鎮雲南茹瑺罷以雲南布政使張統
爲吏部尚書何福大破刁幹孟斬之百彛平賜天下
明年田租之半

建文元年春正月癸酉朔帝受朝不舉樂庚辰祀天
地於南郊始奉太祖配詔修太祖實錄削代王桂護
衛幽於其國二月追尊懿文皇太子爲孝康皇帝廟

號興宗皇太子妃常氏爲孝康皇后尊母呂氏爲皇
太后冊妃馬氏爲皇后封弟允燧爲吳王允煙衛王
允熙徐王詔舉山林隱逸之士賜民年八十以上者
米一石肉十斤酒三十斤九十以上加絮帛繆寡孤
獨及廢疾者歲給米贍之義夫節婦孝子順孫有司
旌其閭瘞暴骨衛所軍戶絕者除其籍初羣臣請立
太子帝謙讓不許至是立長子文奎爲皇太子更定
官制詔諸王毋得節制文武吏士免官民賃舍錢三
月罷天下讞苛不急之務釋奠於先師孔子北平僉
事湯宗上變告按察使陳瑛受燕王金有異謀詞連

布政使曹昱副使張璉竄有差詔都督宋忠率軍
三萬屯開平悉遷燕護衛精卒隸之召燕護衛指揮
閔童等還京師調北平永清二衛軍於彰德順德命
都督僉事徐凱練兵臨清耿墩練兵山海關以備燕
癸巳刑部尚書暴昭戶部侍郎夏原吉等二十四人
充採訪使巡行天下問民疾苦甲午京師地震求直
言夏四月戊辰湘王栢有罪自焚死召齊王榑至京
師廢爲庶人五月遣燕世子高熾及其弟高煦高燾
還北平詔天下能通經者雜流戍卒皆得引試補儒
學官六月削岷王榘護衛遷之漳州己酉燕山護衛

百戶倪諒告變詔收燕府旗校于諒等誅之書讓燕王會王府人奏事至執訊之具得燕諸不法狀遂遣中官逮燕府官屬密詔都指揮張信執燕王信叛附燕秋七月癸酉燕王棣舉兵反布政使張曷都指揮使謝貴燕府長史葛誠等死之叅政郭資副使墨麟等皆降於燕都指揮馬宣走薊州俞瑱走居庸閔宋忠保懷來通州指揮房勝遵化指揮蔣玉密雲指揮鄭亨各以城降燕燕兵陷薊州馬宣戰死河北蝗有司請使督捕帝曰朕以不德致蝗何更殺蝗以重朕過臣民其極言朕失俾得修改有司赦疑獄捐逋租

周窮乏務修實政以弭災變己卯燕兵陷居庸閫俞
瑱走懷來甲申階懷來宋忠俞瑱被殺都指揮彭聚
孫秦戰死丙戌永平指揮郭亮趙彞叛降燕省躬殿
成置古圍籍其中退朝御之谷王穗自宣府奔京師
以燕王棣反告于郊廟社稷削其屬籍命長興侯耿
炳文爲征虜大將軍駙馬都尉李堅都督甯忠爲左
右副將軍帥師三十萬北伐詔曰朕纂承大統宵衣
旰食撫我兆民豈意邦家不造骨肉周親乃謀大逆
去年周廢人構潛爲不軌辭連燕齊湘三王朕以親
親之故止正捕罪餘置不問今年齊王搏謀逆事覺

又言與燕王棣湘王栢同謀栢伏罪自焚死棣已廢
為庶人朕以燕王棣孝康皇帝母弟未忍竟誅詎棣
包藏禍心爲日已久印造偽鈔藏匿罪人先皇帝在
時震怒成疾至于升遐海內莫不痛憤猶不自悔復
稱兵構亂圖危社稷得罪天地祖宗朕不敢赦是用
告於郊廟廢爲庶人命將致討詔示天下使明知之
置平燕布政司于真定以暴昭掌司事刑部左侍郎
侯泰爲尚書八月壬戌耿炳文及燕兵戰於滹沱河
北敗績李堅甯忠顧成被執炳文收兵保真定燕兵
引還召遼王植寧王權權來奉詔削其護衛丁卯李

景隆爲大將軍代耿炳文。九月己丑景隆至德州合
兵五十萬軍於河間。壬辰江陰侯吳高帥遼東兵攻
永平不克而還。冬十月壬寅燕兵襲陷大寧都指揮
朱鑑死之。房寬叛降燕。辛亥李景隆帥師圍北平。燕
兵還救。十一月辛未景隆及燕兵戰于鄭村壩。敗績
亡士卒二十萬。奔還德州。北平城下諸軍皆潰。罷齊
泰黃子澄官。留之京師。茹瑺復爲兵部尚書。十二月
辛酉駙馬都尉王寧謀叛。錮之。其家肅王模乞內徙。
改封蘭州法司。奏今年論囚視往歲減十之三。
二年春正月丙寅朔詔天下來朝官勿賀。丁卯釋奠。

於先師孔子二月癸丑燕兵攻大同李景隆自德州
赴援燕兵還北平保定知府維僉叛降燕甲子詔曰
往以獄訟繁多更御史臺爲都察院與刑部分理庶
獄今賴祖宗之靈斷獄頗簡其復爲御史府省御史
員定置二十八人專以糾貪殘舉循良匡政事宣教
化爲職敦尚忠厚期底治平吏部左侍郎練子寧僉
都御史景清爲左右御史大夫詔曰國家有惟正之
供田賦不均民不可得而治江浙賦獨重而蘇州松
江官田悉準民家私租起稅初以懲不率耳久而弗
除民將不勝困今悉與減免詔毋踰一斗有司違者

罪之蘇松人仍得官戶部三月丙寅朔日有食之策
試天下貢士賜胡廣等一百十八人進士及第出身
有差諸武弁失職者竄於燕燕盡復其官夏四月詔
軍士通經者衛所官得薦舉己未李景隆及燕兵戰
於白溝河敗之庚申復大戰破其後軍己而大敗都
督瞿能指揮俞通淵滕聚等皆戰死景隆奔德州五
月辛未奔濟南癸酉燕兵陷德州遂攻濟南庚辰李
景隆及燕兵戰敗績景隆遁燕兵圍城叅政鐵鉉都
督盛庸固守六月乙酉遣尚寶丞李得成諭燕罷兵
不從都督僉事朱榮棄樂安遁伏誅秋八月癸巳朔

承天門災詔求直言戊申鐵鉉盛庸等擊敗燕兵燕
兵引却濟南圍解遂乘勝復德州九月辛未新作承
天門成更名曰臯門午門曰端門端門曰應門前門
曰路門詔洪武中臣僚註誤得罪者悉錄其子孫封
盛庸爲歷城侯擢鐵鉉山東布政使參贊軍務尋進
兵部尚書以庸爲平燕將軍都督陳暉平安爲左右
副將軍諭諸將曰昔蕭繹舉兵令其下曰一門之內
自極兵威不仁之甚朕不忍聞爾等與燕王戰務禮
此意毋使朕負殺叔父名召李景隆還冬十月庚申
燕兵襲滄州都督徐凱程暹被執十一月清遠衛卒

羅義上書請息兵議和下之獄十二月甲午燕王掠濟寧盛庸移軍東昌乙卯燕兵攻東昌盛庸鐵鉉擊敗之斬其將張玉丙辰復戰又敗之燕兵走館陶詔舉文學優通之士是年戶部尚書郁新罷以浙江布政使王鈍代之

三年春正月辛酉朔作凝命神寶成乙丑燕兵北還次深州吳傑平安出兵邀之不利丁丑以東昌之捷告太廟三月辛巳盛庸及燕兵戰於夾河敗之斬其將譚淵再戰不利都指揮莊得楚智等死之壬午復戰敗績庸奔德州丁亥都督何福將兵赴德州癸巳

遣齊泰黃子澄出募兵名賊竄以謝燕閏三月壬辰
更定禮制成頒之天下乙未燕兵掠真定己亥吳傑
平安及燕兵戰於橐城敗績己酉燕兵至順德辛亥
至廣平癸丑至大名三府官吏皆迎降燕王棟上書
請召還諸將遣大理少卿薛嵩報之夏六月遣太僕
少卿祝孟獻易馬朝鮮秋七月詔限僧道田人五畝
餘以賦民非朝命不得自度女子年未五十不許爲
尼定銓選法九月甲辰倭寇浙東冬十月徙封慶王
楠於寧夏十一月壬辰楊文以遼東軍圍永平及燕
將劉江戰於昌黎敗還己亥平安及燕將李彬戰於

楊村敗之辛亥迤北遣使附於燕壬子寇鐵嶺殺百
戶彭城十二月癸亥燕兵焚真定軍儲詔中官奉使
侵暴吏民者所在有司繫治駙馬都尉梅殷統兵鎮
淮安平安攻通州不克是年貶安陸侯吳傑爲南寧
指揮使迤北可汗坤帖木兒死鬼赤力爲可汗

四年春正月命徐輝祖率師援山東燕兵陷東平汶
上沛蕭諸州縣進薄徐州守將禦之敗績三月甲申
朔燕兵趨宿州平安追及之戰於泥河斬其將王真
再戰遇伏敗績御史曾鳳韶使燕議罷兵不納夏四
月丁卯何福平安敗燕兵於小河斬其將陳文甲戌

徐輝祖及何福等敗燕兵於齊眉山斬其將李斌召
輝祖還丁丑何福移軍就糧營於靈壁己卯平安赴
靈壁及燕兵大戰敗績庚辰燕兵陷靈壁何福遁平
安陳暉等被執五月辛卯燕兵襲盛庸軍於淮上庸
敗走燕兵遂渡淮趨揚州指揮王禮等以城降御史
王彬指揮崇剛死之辛丑燕兵次六合諸軍迎戰敗
績壬寅詔天下勤王遣練子寧等分道徵兵召齊泰
黃子澄還朝蘇州知府姚善寧波知府王璉徽州知
府陳彥回樂平知縣張彥方各起兵入衛甲辰遣慶
成郡主如燕軍議割地罷兵不聽六月癸丑朔燕兵

次浦子口盛庸率舟師敗之復戰不利遣都督僉事
陳瑄以舟師援庸軍瑄叛降燕乙卯燕兵渡江盛庸
禦之高資港敗績戊午指揮童俊以鎮江降燕庚申
燕兵營于龍潭辛酉命諸王分守都城遣李景隆茹
瑋及都督王佐如燕軍約和壬戌復遣谷王穗安王
楹往皆不從羣臣勸帝幸浙或幸湖湘方孝孺請堅
守都城待援癸亥命徐輝祖等分道出禦諸軍悉潰
散乙丑燕兵薄金川門左都督徐增壽有異志帝手
誅之谷王穗及李景隆叛開門納燕兵宮中火發帝
及后馬氏崩燕王發哀於龍江以天子禮祭葬之或

言帝實由地道出亡。正統五年有僧從思恩府自詭
建文皇帝土官知府岑瑛以聞。逮至京師。按問乃鈞
州白沙里人。揚行祥。洪武十七年爲僧。年九十餘。非
帝也。錮之錦衣衛。四閱月死。同謀僧十二人。并戍遼
東。初太子文奎以十月晦生。太祖以月日皆終。令羣
臣勿賀。京師破。太子方七歲。莫知所終。次子文圭。方
二歲。廢爲建庶人。幽之宮中。後英宗憐之。赦居鳳陽
。年五十七矣。不能識牛馬。天下聞而哀之。弘治中。台
州人繆恭請封建庶人。後奉懿文太子祀。有司繫恭
以聞。詔勿問。萬曆十六年。司業王祖嫡請復建文年。

號閭臣申時行等言考成祖實錄仍稱元年二年三年四年是建文年號實未嘗革除也議遂寢二十三年詔修國史命附載高皇帝紀之後仍其年號而史卒不成故其事多軼不傳崇禎中工部郎中李若愚請定建文廟謚下禮部議不果行福王立竟從禮臣顧錫疇言上帝謚曰嗣天章道誠懿淵恭覲文揚武克仁篤孝讓皇帝廟號惠宗

論曰帝以弱主而當強藩措注乖方任使罕當召釁速禍理勢宜然正恐雖有良平亦難乎其爲計耳即如藩兵向關既以告諸祖廟削其宗系而仇讎之矣

及命將出師則又曰毋使我負殺叔父名嗚乎斯言也信耶否耶借曰信也是懿親且重於宗社矣不知東山破斧姬公何以拳拳王室而竟致辟於三監耶且既曰燕諸父行也則亦第遜焉可耳乃連年北伐不憚聲罪以致討又胡爲是皇皇也哉然則帝之不競帝實爲之不得嵩咎於謀臣之弗善也亦審矣不然齊黃方練率皆先帝顧命臣也當時憑几末命何如其鄭重而顧乃輕忽委任俾受終大事直付之彌留之一擲而曾莫爲永念耶安劉必勃輔政以光在漢室已褒然可述太祖自視爲何如主而付託不效

遂遠愧於高武二帝之爲其亦事理之難用解說者
與

明史卷六

本紀六

成祖上

成祖諱棣太祖第四子也母孝慈皇后以元至正二十年四月癸酉生洪武三年封燕王十三年之國北平狀貌奇偉美髯髯勇智有大略能推誠任人二十三年奉命同晉王討乃兒不花晉王怯不敢進成祖倍道趨迤都山獲其全部而還自是連出塞有功威名日盛建文帝方爲太孫頗疑憚之太祖崩建文帝立周湘代齊岷五王皆得罪成祖內自危佯狂稱疾不出齊秦黃子澄密請除之計未決建文元年六月

燕山百戶倪諒告變朝廷乃收府校于諒等誅之下
詔讓成祖成祖遂稱病篤都指揮使謝貴等以兵迫
守其宮成祖密與僧道衍謀令指揮張玉集勇士八
百人入城守衛七月癸酉匿兵端禮門內給貴及布
政使張昺入擒殺之盡奪九門遂起兵略定北平屬
縣自署官屬丁丑諭將士以興兵之故名其師曰靖
難己卯拔居庸關甲申克懷來丙戌下永平戊子上
書于朝罪狀齊泰黃子澄等是月建文帝命大將軍
耿炳文帥師北戌八月己酉炳文至真定前鋒抵雄
縣壬子成祖引軍渡白溝河謂將士曰今名中秋彼

不虞我至乘其不戒可破也趣諸軍行夜半圍雄縣拔其城屠之甲寅都督潘忠揚松自鄭州來援伏兵月樣橋擊擒之遂趨鄭州盡降其衆明日還軍白溝河獲炳文部校言炳文軍十三萬至滹沱半營河南半營河北成祖縱之歸使言北兵且至諸將曰南軍衆方掩其不備奈何告之成祖曰彼既夾河而營我徑薄城下擊北岸軍縱能勝之南岸之衆乘我敝盡銳於我此危道也今俾知我將至彼必合軍於北一舉可盡敗之矣壬戌至真定南岸軍果悉渡河成祖將輕騎與張玉譚淵等夾擊大破之擒左副將軍李

堅右副將軍甯忠都督顧成等斬首三萬引軍還建
文帝使曹國公李景隆代炳文爲大將軍九月進營
河間時江陰侯吳高都督耿璈圍永平成祖曰景隆
養子色厲而中餒吾在彼不敢遽來不若往援永
平以致其師吳高怯不任戰聞我至必走還擊景隆
破之必矣諸將請守盧溝橋成祖曰秋水方涸渡易
耳守一橋何爲不如舍之以驕敵心兵法所謂利而
誘之者也壬辰吳高聞成祖至果遁走追擊敗之遂
北取大寧時都督劉真陳亨扼松亭關乃間道走劉
家口十月壬寅抵大寧急攻克之成祖入城見寧王

執手哭言窮蹙舉兵邀寧王為奏求赦罪丁未陳亨襲破劉真舉松亭之衆降李景隆聞成祖赦永平果引軍攻北平築壘九門遣別將攻通州甲寅成祖自大寧還寧王出餞於郊伏兵擁之以行遂拔大寧之衆及朶顏三衛銳卒俱南乙卯師至會州乃立五軍張玉將中軍鄭亨何壽副之未能將左軍朱榮李濬副之李彬將右軍徐理孟善副之徐忠將前軍陳文吳達副之房寬將後軍和允中毛整副之丁巳入松亭關十一月庚午師次孤山前驅言白河流漸不可渡至則冰已合乃畢渡都督陳暉來追敗還河冰解

暉衆多溺死辛未與景隆戰於鄭村壩成祖以精騎
連破其七營景隆軍大潰乙亥再上書於朝索用事
大臣及太祖左右侍疾者移檄天下甲申大賚將士
十二月丁酉朔成祖患遼東兵數擾永平乃以計間
吳高高削職去成祖知景隆必再舉乃引軍征大同
曰我往彼必來救大同苦寒南軍脆弱不戰疲矣庚
申師次廣昌二年正月丙寅朔次蔚州皆下其城二
月丁未迤北國公趙脫列干等率衆來附癸丑軍至
大同景隆果來援遂引還景隆軍凍餒死甚衆癸亥
景隆遣書勸罷兵成祖荅書索齊秦黃子澄等乙丑

祭陣亡將士瘞其骸北山麓四月李景隆進兵河間
與武定侯郭英安陸侯吳傑都督平安期至白溝河
皆會乙卯成祖渡王馬河營蘇家橋兵端有火光金
鐵皆鳴己未祝告于天有神爵五色集旗上徐西北
飛去成祖神之由西北循河進遇平安兵白溝河側
成祖以百騎前佯却安逐之陣動成祖乘之安敗走
遂進薄景隆軍戰不利暝收軍成祖以三旗殿夜迷
失道下馬伏地視河流乃辨東西渡河去庚申復合
戰時南軍號百萬橫陳數十里勢銳甚後軍房寬與
戰不利成祖親率精騎大呼馳下橫擊之斬驍將瞿

能父子於陳會丘福以萬騎衝其中堅不得入成祖
乃盪其左南軍繞成祖後大戰良久飛矢如注成祖
所乘馬三被創三易之矢三箠皆盡揮劍躍馬左右
擊劍折南軍益進成祖急走登堤佯揮鞭招其後南
軍疑有伏不敢踰堤子高煦兵適至乃解成祖曰吾
不進敵不退有戰耳復以勁卒突出其背夾攻之會
旋風起折南軍大將旗成祖乘風縱火奮擊南軍大
潰斬首數萬溺死者十餘萬人枕屍百餘里景隆走
濟南五月癸酉成祖入德州獲糧儲百萬庚辰攻濟
南敗景隆軍於城下辛巳隄水灌其城圍之不克八

月戊申解圍還北平九月盛庸代李景隆為將軍時庸屯德州吳傑平安屯真定都督徐凱等屯滄州相犄角以困北平成祖患之會滄州城壞未築成祖欲襲之聲言征遼東密遣徐理陳旭詣直沽造浮橋晝夜倍道行十月戊午襲滄州破之遂自長蘆渡河過德州盛庸遣兵來襲擊敗之十一月壬申至臨清甲戌移軍館陶掠大名奪糧焚其舟十二月甲午駐軍汶上襲破孫霖於滑口乙卯移軍東昌盛庸背城而陣列火器勁弩以待成祖麾兵競前多為所傷會平安兵亦至與庸軍合圍成祖數重未能攻其東北成

祖乃得從西南潰圍出大敗還亡數萬人張玉戰死
三年正月辛酉朔敗吳傑平安軍于威縣乙丑又敗
之深州丙子還北平二月乙巳師復出己酉次保定
諸將請攻定州成祖曰野戰易攻城難我頓兵城下
彼將合力來援勝負殆難決也真定距德州遠勢不
相及我軍出其中視先至者擊之敗其一軍餘自瓦
解耳三月庚申朔進次滹沱河辛巳與盛庸軍過於
夾河成祖略陣過庸出千騎來追成祖連射三人殪
庸軍不敢逼乃令步軍攻其左庸軍擁盾自蔽成祖
令將士施鈎於積擲以貫盾遂縱騎乘之庸軍皆前

奔譚淵逆戰死朱能張武等殊死戰成祖自後貫其中與能等合斬其驍將張得楚智皂旗張等日暮各斂軍還營成祖以數十騎逼庸營而宿天明引馬鳴角穿營而去壬午復戰成祖軍東北庸軍西南相持久未決忽疾風東北起揚塵蔽天庸軍咫尺不相見燕軍乘風大呼縱左右翼橫擊之庸軍大敗追至滹沱河斬溺死無算庸走德州復破其餘軍於單家橋吳傑平安引軍出聞庸敗復還真定成祖欲誘傑等出戰令校尉荷擔抱嬰兒若避兵者入真定揚言北軍皆出求糧營中無備傑等信之引兵來襲閏三月

戊戌遇於藁城己亥鏖戰會大風起發屋拔樹傑等不能支遂敗斬首六萬餘級追至真定城下而還癸丑至大名聞齊秦黃子澄已竄逐乃復上書請息兵建文帝使大理少卿薛崑來報成祖問之崑曰殿下旦釋甲募即旋師成祖怒曰欲給我耶諸將請殺崑不許遣歸五月吳傑平安盛庸分兵斷北平餉道成祖乃使指揮武勝復上書於朝建文帝得書下勝獄成祖聞之怒遣李遠至沛焚糧舟萬艘七月己丑掠彰德丙申平安乘虛搗北平成祖遣劉江率千騎迎戰於平村安敗走大同都指揮房昭據易州西水寨

略保定成祖引兵圍之十月丁巳都指揮花英援昭
敗之義眉山下斬首萬級昭棄寨走己卯還北平十
一月乙巳成祖自爲文祭陣亡將士當是時靖難兵
起三年矣常乘勝逐北然所克城邑兵去即復爲朝
廷守成祖所有僅北平永平保定三府而已無何中
官被黜者多來奔具言京師空虛可取狀成祖乃慨
然曰頻年用兵何時已乎要當臨江一決不復返顧
矣十二月丙寅諭將士出師四年正月甲申李遠敗
南軍於滹沱河戊子朱能兵捷于衡水乙未成祖由
館陶渡河癸丑師至徐州二月甲戌遣騎誘城中兵

出擊斬三千級三月甲申朔趨宿州壬辰至渦河居
數日平安來襲成祖設伏淝河待之安追之急驍將
王真戰死安騎將火耳灰持稍將及成祖指揮童信
射其馬踣禽之南軍遂却成祖赦火耳灰弗殺令侍
衛丙午遣譚清斷徐州餉道南掠淮河還至大店為
鐵鉉所圍成祖望見引兵馳援之與火耳灰出入敵
陣南軍辟易清突圍出合擊遂大敗之四月丙寅成
祖綴敵至小河為橋以濟平安軍爭橋成祖親搏戰
平安墜且及成祖馬忽蹶不得前張武自林間突出
夾擊遂破之甲戌戰齊眉山下李斌死時盛暑疾疫

將作諸將請渡河擇地駐師息士馬觀釁成祖曰兵
事有進無退今勝形成矣奈何復北懈將士心乃下
令曰欲渡河者左不欲者右諸將爭趨左成祖怒未
能請斬欲退者諸將乃不復言南軍就糧營靈壁己
卯平安分兵護糧成祖率精騎擊之又縱步兵橫斷
其陣為二何福空壁來援成祖軍稍却高煦伏兵猝
起福大敗斂兵入營成祖謂諸將曰是且欲遁宜謹
備之福等既失糧將移軍淮河令其下三砲則出辛
巳成祖薄其壘三震砲南軍誤以為軍號爭出走遇
燕軍大驚亂燕軍掩擊大破之生擒平安陳暉等百

八十餘人惟福走免五月己丑下泗州遂謁祖陵賜
父老牛酒辛卯盛庸扼淮南岍成祖遣朱能丘福潛
濟襲走之遂渡淮克盱眙己亥徇揚州降之六月癸
丑朔防江都督僉事陳瑄率舟師迎降甲寅祭告大
江乙卯遂自瓜州渡盛庸列海艘逆戰成祖擊之潰
戊午徇下鎮江庚申師駐龍潭建文帝使大臣來乞
和諸王繼至皆不聽乙丑至金川門谷王穗開門延
成祖入建文帝闔宮自焚成祖次龍江發哀下令慰
撫軍民大索齊秦黃子澄等榜示其姓名曰奸臣丙
寅安王楹率兵部尚書茹瑺等上表勸進己巳成祖

謁孝陵還遂即皇帝位復周齊二王爵庚午詔建文中所更政令條格及諸殿門名悉還其舊壬申葬建文帝丁丑下徐輝祖于獄執齊秦黃子澄方孝孺殺之夷其族御史大夫練子寧禮部尚書陳廸刑部尚書暴昭侯秦戶部侍郎郭任盧迥禮部侍郎黃魁刑部侍郎胡子昭工部侍郎卓敬都御史茅大芳周璿大理少卿胡閏太常少卿盧原質御史高翔等皆不屈并殺之餘坐奸黨論死者甚衆戊寅遷孝康帝主于陵園仍稱懿文太子七月壬午朔祀天地于南郊大赦天下今年仍以洪武紀號明年為永樂元年建

文中上書陳言有干犯者一切弗問山東北平河南
州縣民被兵不能墾田者復徭役三年未被兵者與
鳳陽淮安徐滁揚州皆賜租一年其餘州縣賜今年
田租之半癸未召前北平按察使陳瑛為左副都御
史凡建文朝廢斥者盡復其官己丑楚王楨來朝癸
己改封吳王允燧為廣澤王衡王允燧為懷恩王徐
王允熙為敷惠王丙申諭兵部曰朕舉義師清君側
之惡罪止奸臣數人而已今罪人已誅嘉與萬方同
樂至治比聞軍民未喻朕心謂當復行誅戮轉相扇
惑何其愚也亟諭令樂業敢妄言惑衆者誅之知而

不告與同罪辛丑吏部尚書張統戶部尚書王鈍罷
統自經死甲辰命前尚書嚴震直王鈍府尹薛正言
等巡視山西山東河南陝西丙午召郁新為戶部尚
書改工部尚書鄭賜于刑部戊申舞陽民王忠殺知
縣據城作亂指揮王真捕斬之是月命侍讀解縉編
修黃淮入直文淵閣預機務尋命侍讀胡廣修撰楊
榮編修楊士奇檢討金幼孜胡儼同直八月壬子朔
執兵部尚書鐵鉉於山東殺之壬戌代王桂來朝癸
亥晉王濟燿來朝甲子命獄囚輸米北平贖罪丁卯
殺御史大夫景清夷其族九月辛巳朔肅王拱來朝

壬午蜀王椿來朝甲申論靖難功封丘福為淇國公
未能成國公張武等侯十三人徐祥等伯十一人論
欵附功封駙馬都尉王寧為侯茹璫陳瑄及都督同
知王佐皆為伯以吏部侍郎蹇義戶部侍郎夏原吉
兵部侍郎劉儁俱為本部尚書丁亥遣使以即位詔
安南日本諸國己丑慶王楸來朝辛卯大賚軍民乙
未徙山西民無田者實北平給之鈔賜復五年戊戌
工部侍郎黃福為尚書十月壬子寧王權來朝徙封
南昌丁巳吏部言靖難兵起北平州縣官朱寧等二
百一十九人俱棄官遁宜置諸法命入粟免死戊興

州己未重修太祖實錄辛未賑青州諸府蝗災復其徭役甲戌詔從征將士掠民間子女者還其家官給道里費十一月壬辰冊妃徐氏為皇后廢廣澤王允燧懷恩王允熈為庶人癸卯岷王榘來朝十二月庚戌朔右通政李至剛為禮部尚書癸丑蠲北平山東山西河南及鳳陽淮安揚州徐被兵州縣明年夏稅除山東積逋鹽課丙寅河間饑詔民煮鹽易米者勿禁丁丑賑順德保定貧民

永樂元年春正月丁亥陳瑛為左都御史辛卯以北平為北京甲午月食陰雨不見李至剛請率百官賀

不許丁酉賑大名饑二月庚戌設北京留守行後軍
都督府行部園子監改北平曰順天府辛亥以戶部
尚書掌北平布政司事郭資刑部尚書掌保定府事
雒僉為行部尚書壬子賑平陽饑乙卯遣御史分巡
天下癸亥耕籍田乙丑遣中官侯顯以書幣往烏思
藏徵尚師哈立麻己巳詔於八月補去年鄉試賑河
間廣平順德真定保定饑辛未命法司五日一引奏
罪囚壬申遣使督漕經戰地暴骨甲戌皇子高陽王
高煦備邊開平三月壬午改北平行都司為大寧都
司徒保定始棄大寧之地戊子平江伯陳瑄都督僉

事宣信充總兵官分督海運餉遼東北京歲以為常
甲午賑北京山東河南鳳陽淮安徐饑辛丑鄧州官
牛疫死有司責民償至鬻子女事聞命贖還之抵有
司罪夏四月戊申申諭中外羣臣曰帝王圖治必審
於用人若唐太宗用王珪魏徵宋太祖用范質王溥
或取諸亡國或舉於仇讐惟其賢而已矧今文武在
位皆皇考舊臣非亡國仇讐比昔孟莊子不改父之
臣與父之政見稱孔子朕心慕焉故今所任幾務之
重皆非前日靖難之人乃聞羣臣猶懷疑懼蓋不明
朕心故也爾諸臣尚恪共乃職抒誠共事敢生異議

者罪之己酉蘇州松江嘉興湖州大水命夏原吉往治之丙寅以鈔法不通禁金銀市易丁卯詔王府不得私役軍民捕淮安安慶蝗傷禾稼者蠲其租癸酉賚北京及通州守城婦人五月丁丑朔諭戶部曰朕初嗣位即命除荒田租稅乃玩愒不省虛文視之致有司一用舊額科率主澤暹而不流民情鬱而不達大臣為國之道當如是耶其速下所司凡田蕪不治者悉除其籍以省橫徵之擾癸未詔死罪以下遞減一等庚寅捕山東蝗癸巳鈞州蝗蠲今年夏稅乙未命洪武中犯黨逆為建文時舉用者發原配所非黨

逆而經黜刺者罷為民壬寅服歷城諸縣饑甲辰勅
行部曰昔高皇帝既定天下念畿輔五府勞于供億
特優賜復朕舉兵靖難北平民出丁力輸家財佐軍
朕甚嘉之其覈實諸郡民曾効力者以聞於是免順
天永平保定民田租十九萬餘石是月再論靖難功
封駙馬都尉袁容等三人為侯陳亨子懋等六人為
伯六月辛亥以久雨遣戶部侍郎李文郁行視蘇州
松江嘉興湖州四府田被水者除其租壬子代王桂
有罪削其護衛癸丑遣給事中御史與中官錦衣衛
官分行天下有司奸貪者逮治以聞甲子河南蝗有

司不以聞遣御史按治秋七月己亥捕金州諸衛蝗
是月賑淮安徐崑山饑八月己巳令流罪以下發北
京為民墾田甲戌徙天下富民實北京九月己卯大
興進嘉禾薦之太廟癸未鑄農器給山東民被兵者
乙未削歷城侯盛庸爵庸尋自殺庚子岷王梗有罪
削其護衛冬十一月乙亥朔頒曆于朝鮮諸國著為
令壬辰以天寒罷遣京城浚河民夫丙申廣西總兵
官都督同知韓觀討柳州山賊平之閏十一月癸丑
除鳳陽淮安徐今年秋糧之半丁卯封黎蒼為安南
國王十二月乙酉賑棗強饑壬辰陳州靈雨傷稼蠲

其租

二年春正月甲辰勅天下文武諸司曰方春時和東作正興爾諸司宜勤恤軍民申明教術勸課農桑問疾苦卹饑寒務崇寬厚之政用稱朕意乙巳復命夏原吉治水蘇松庚戌有方士獻道經帝曰朕所用治天下者五經耳道經何用斥去之己巳召皇子高熾及高陽王高煦還京師三月壬寅朔策試天下貢士賜曾棨等四百七十二人進士及第出身有差己酉始選進士爲翰林院庶吉士戊辰改封敷惠王允熙爲甌寧王奉懿文太子祀夏四月辛未朔工部右侍

郎金忠為兵部尚書壬申左善世道衍為太子少師
復其姓姚賜名廣孝甲戌立皇子高熾為皇太子封
高煦為漢王高燧趙王丁丑諭法司曰方暑囚多病
其決遣輕罪連引待質者出獄以須甲申文華寶鑑
成以授皇太子六月丁亥詔汰冗官辛卯遣使賑松
江嘉興饑甲午封哈密安克帖木兒為忠順王乙未
命姚廣孝賑蘇州湖州饑是月封徐增壽子景昌為
定國公秋七月丙辰李景隆勒歸第絕朝請辛酉臨
清野蠶成繭李至剛請表賀不許丙寅遣御史賑江
西湖廣水災八月乙亥安南陪臣裴伯耆以黎季犛

父子篡弑來告請討之丁酉故安南國王陳日烿弟
天平來奔九月丙午周王擴來朝獻騶虞百官請賀
帝曰祥瑞之來易令人驕自古明王皆遇祥自警騶
虞若果為祥在朕更當加懼戊申大理少卿吳中為
右都御史丁卯直文淵閣左諭德胡儼為國子祭酒
諭吏部曰朕慮中外守令未必得人命御史巡行考
察夫入其境田野闢人民安禮讓興風俗厚境無盜
賊吏無奸欺足知守令賢矣反是者為不賢比聞御
史但坐館署召問諸生及庶人在官者輒以為信凡
人好惡不同毀譽亦異詢言之弊非止一端即墨東

阿己事可鑒自今御史及按察使考察有司賢否皆令其實跡以聞徙山西民萬戶實北京冬十月庚午製信符及紅牌給西南諸土官己卯齊王搏來朝減崑山荒田租甲申籍長興侯耿炳文家炳文自殺丁亥罷白象食穀十一月甲辰御奉天門錄囚謂廷臣曰囚久困於獄雖枉不復求辯初至朕前又畏不敢言是安得無冤爾等宜更從容訊鞫果其有辭即具以聞癸丑京師及濟南開封地震戒羣臣修職戊午蠲蘇州松江杭州嘉興湖州水災田租六十餘萬石十二月庚寅禮部左侍郎宋禮為工部尚書是月下

李景隆于獄并其家錮之

三年春正月庚子楚王禎來朝甲寅遣使責安南篡奪罪庚申復賜順天永平保定田租二年二月己巳誅行部尚書雒僉辛未蜀王椿來朝丁丑左通政朱濬為行部尚書癸未命趙王高燧居北京三月丙午賑邳饑甲寅蠲黃州長沙岳州常德水災田租夏四月癸未改工部尚書黃福於行部五月丁未肅王模來朝六月己卯遣中官鄭和使西洋諸國庚辰遣中官山壽等率兵出雲州與武城侯王聰會師覘寇甲申命夏原吉等賑饑浙西諭之曰蘇湖諸府仍歲苦

潦今舊穀已罄新苗未成老稚嗷嗷饑餒無告朕與
卿等能獨飽乎其亟往賑之有當建革者速以聞免
天下農民戶口食鹽鈔庚寅安南黎蒼謝罪請迎陳
天平歸國辛卯諭戶部曰浙西被水民多轉徙求食
其令所在有司善存撫之毋驅逐水平復業無糧種
者官給之秋七月戊戌興平鳳翔進瑞麥李至剛率
羣臣表賀不許八月戊辰李至剛有罪下獄郁新卒
夏原吉還理部事辛巳遼王植來朝九月丁酉蠲蘇
州松江常州杭州嘉興湖州水災田租凡三百三十
八萬石己亥改刑部尚書鄭賜於禮部以大理卿呂

震代之癸卯蘇門答刺滿刺加古里入貢戊申谷王
穗來朝乙卯瓜哇碟里日夏羅治金猫里入貢丁巳
徙山西民萬戶實北京庚申慶王榘來朝冬十月乙
亥趙王高燧來朝丙子封都督同知許成為永新伯
是月忠誠伯茹璫下獄除名十一月甲午進封信安
伯張輔為新城侯封甘肅總兵官左都督宋晟為西
寧侯辛丑日本國王源道義獻倭人嘗為邊患者賜
以冕服十二月戊辰西平侯沐晟討八百降之庚辰
命都督僉事黃中呂毅以兵納陳天平於安南
四年春正月壬寅琉球進闈人還之丙辰舉午朝諭

六部尚書及侍從臣曰早朝奏事多有不得盡言午後事簡可從容陳論朕不憚勞也朕每四鼓輒興衣冠靜坐思四方之事緩急之宜朝退取奏牘一一省覽暇則觀經史不敢自逸卿等體朕此心相與共勵毋怠數也辛酉西域貢佛像舍利金塔命百官迎之龍江關二月己卯命軍官有罪戍邊者皆復職三月辛卯朔釋奠于先師孔子壬寅策試天下貢士賜林環等二百一十九人進士及第出身有差甲午設遠東開原廣寧馬市丙午安南黎蒼襲殺陳天平於芹站前大理鄉薛嵩死之黃中等引兵還夏四月己卯

遣使購遺書己丑有校尉訐朝臣謗毀時政者帝曰
必誣也朝廷未嘗行此事彼安得有是言詰之果誣
帝曰人主聽言誣可不察向若遽付法司則死於誹
謗必矣小人誣君子風不可長執校尉罪之五月丁
酉賑常州廬州安慶水災戊申秦王尚炳來朝庚戌
齊王搏有罪削其護衛處之京師六月己未朔日當
食陰雲不見鄭賜請表賀不許甲子諭近臣曰頃在
宮中偶忘一事問左右皆不能記沉思久乃得之朕
以一人決萬幾豈能一一無遺誤拾遺補過近臣職
也自今事務爾等謹識之裁決或未當第直諫毋有

所隱丙寅南陽獻瑞麥薦之太廟戊寅賑靜寧平涼
諸州縣饑秋七月辛卯命朱能為征彝將軍沐晟張
輔為左右副將軍分道率師討安南兵部尚書劉儁
贊軍務諭之曰安南之人皆朕赤子惟賊臣黎季犛
父子同惡在法必誅他脅從者釋之罪人既得立陳
氏子孫之賢者毋養亂毋玩寇毋毀廬墓毋害禾稼
毋攘財貨掠子女毋殺降有一於此雖功不宥癸卯
師行帝躬祭大江饗將士臨江送之乙巳申誹謗之
禁是月賑丹徒黃梅甘泉嘉興諸縣饑于闐入貢閏
七月壬戌分遣尚書宋禮等採木四川湖廣江西浙

江山西八月丁酉詔通政司凡書奏關民事者雖小必以聞東洋馮嘉施蘭入貢己亥賑北京旱災山東蝗災癸丑廢齊王搏為庶人九月戊午申民間巾服之制戊辰賑蘇州松江常州杭州嘉興湖州流民復業者十二萬餘戶辛未晉王濟熿來朝冬十月戊子朱能卒于軍命張輔領其衆十一月己巳甘露降孝陵松栢醴泉出神樂觀薦之太廟賜百官十二月辛卯赦天下殊死以下張輔破安南兵於嘉林江克多邦城遂取其東都西都戊戌趙王高燧來朝己酉尚師哈立麻至命百官迎之三山門外御奉天殿見之

賜金帛法器儀仗辛亥旤寧王允熙邸第火王薨婆
羅入貢

五年春正月己未吳中為工部尚書己巳建五臺山
佛殿浮圖張輔等大敗安南兵於木九江辛未戍民
私為僧者千八百人於邊丙子蠲順天州縣水災田
租二月庚寅命尚師哈立麻建普度大齋于靈谷寺
出翰林學士解縉為廣西叅議癸巳命張輔訪安南
賢才禮遣赴京師甲寅蠲保定真定水災田租三月
丁巳封尚師哈立麻為大寶法王辛巳張輔等大破
安南兵於富良江夏四月己酉賑順天河間保定饑

五月丙辰徙平陽澤潞登萊民五千戶於上林苑種
牧甲子張輔獲黎季犛黎蒼獻於京師安南平辛未
勅都察院曰朕每歲春首若農隙勅郡縣濬渠築陂
䟽捕蝗蝻遇饑年即賑貸惟恐傷民乃者河南薦遘
水旱有司匿不以聞更言雨暘時禾稼茂及遣視之
或半收或十不及一有掇草實為食者亟命發粟道
殍已多此朕任用非其人之過也今悉置之法其榜
諭天下後凡災傷不以實聞者罪如之六月癸未朔
以安南平詔天下置交趾布政司黃福兼掌布政按
察二司事辛卯禮部右侍郎趙珰為尚書甲午詔中

外文武官自永樂二年六月犯罪去職者悉宥之乙未命張輔移師與韓觀共討潯柳叛蠻庚子中官李進詐稱詔旨採天花於山西械治之辛亥柳州旱遣使賑恤秋七月乙卯皇后徐氏崩丁卯河溢河南傷稼八月庚子赦罪囚非惡逆殺人皆減死論流以下悉宥之九月壬子鄭和使西洋還俘海賊陳祖義等至京師斬之小葛蘭阿魯入貢乙卯御奉天門受安南俘下黎季犛父子于獄大賚將士冬十月丙戌衛卒有母病乞假而主者不聽帝怒曰彼豈無母之人耶黜戍邊丁未潯柳蠻平十一月癸丑蠲湯陰水災

田租

六年春正月丁巳削岷王榷護衛甲戌趙王高燧來
奔喪二月丁未免北京雜辦課程三年除其逋三月
乙卯除河南山東山西逋賦丁丑蘇州揚州言檜花
為瑞帝曰昨福建奏栢花之祥今蘇揚又言檜花諸
郡水滂為災有司蔽不以聞乃嵩務獻諛至此其下
詔切責之是月賑來安舒城麓江饑夏四月丙申賑
獻饑始命雲南行鄉試五月癸亥詔赦交趾餘賊六
月庚辰諭北京諸司曰北京自軍興來民困未蘇比
以營建大役重勞吾民屢勅所司存恤而任事者忽

不究心驅迫侵漁民訴無所廉得其實已悉置于理
自今北京諸郡不急務及諸市買悉停罷流民來歸
者給復三年辛巳詔軍民擅為僧者并父兄五臺山
輸作庚寅楊榮以父喪去尋起復辛丑鄭賜卒甲辰
右副都御史劉觀為禮部尚書秋七月癸丑論平交
趾功進封張輔英國公沐晟黔國公王友清遠侯封
都督僉事柳升為安遠伯八月乙酉交趾簡定反沐
晟為征彝將軍討之劉儁仍贊軍務丁亥唐王桎郢
王棟伊王樸俱之國乙未浣泥國王麻那惹加那乃
率妻子來朝尋卒葬之京師九月戊申疏滯獄辛酉

榜葛刺入貢乙丑建昌撫州建寧邵武大疫死者八
萬人命有司賑恤癸酉復遣鄭和使西洋冬十月癸
巳安王楹之國十一月己酉潘王模之國丁巳錄囚
十二月辛卯命柳升陳瑄等率舟師沿海捕倭丁酉
沐晟及簡定戰於生厥江敗績劉儁及都督僉事呂
毅交趾叅政劉昱死之戊戌命豐城侯李彬及都督
僉事費瓛都指揮羅文等由淮安蘇州分道捕倭己
亥改禮部尚書劉觀於刑部刑部尚書呂震于禮部
庚子命都指揮姜清張真充總兵官赴廣東福建捕
倭是歲迤北可汗鬼力赤為其部下所殺立本雅失

里為可汗

七年春正月辛亥楊榮有母喪詔仍起復癸丑賜百官上元節假十日民間張燈宴飲弛夜禁著為令二月甲戌朔以北巡命皇太子監國乙亥遣使于巡狩所過縣存高年八十以上賜酒肉九十加帛丙子徵致仕官知府劉彥才等九十二人分署府州縣曰朕巡北京思得老成人列置郡縣以稱撫綏之寄朕歸即遣還不久煩以政也辛巳告北巡于郊廟社稷壬午復命張輔為征虜副將軍王友副之率師討簡定帝發京師戊子駐鳳陽謁皇陵親負土培其封諸扈

蹕者皆負土從己丑遣使祭靈壁陣亡將士自是經
戰地皆祭之三月甲辰朔次東平望祭泰山壬戌至
北京癸亥大賚官吏軍民甲子行在兵部左侍郎方
賓為尚書丙寅詔奉天征討將士及北京効力人民
雜犯死罪咸宥之充軍者官復職民還籍夏四月癸
酉朔皇太子攝享太廟自是帝北巡凡郊廟社稷皇
太子攝祀事以為常壬午海寇犯欽州敗去閏四月
甲子蠲安肅電災田租五月己卯營壽陵于昌平封
其山曰天壽庚寅賜皇太子聖學心法癸巳簡定偽
稱太上皇立陳季擴為越皇帝乙未封瓦剌馬哈木

為順寧王太平賢義王把禿孛羅安樂王六月辛亥
命在外諸司勿朝行在給事中郭驥使本雅失里為
所殺丁卯斥御史洪秉等四人為序班詔自今御史
勿用吏己巳哈烈火州入貢庚午徙青州民無業者
八百餘戶於冀州秋七月癸酉命丘福為征虜大將
軍武城侯王聰同安侯火真為左右副將軍靖安侯
王忠安平侯李遠為左右叅將率師討本雅失里戊
戌沔縣妖賊金剛奴伏誅是月迤北王把禿等率所
部款甘肅塞丞相魯卜等率所部款寧夏塞降八月
甲寅丘福軍渡臚胸河與寇戰敗績及王聰火真王

忠李遠皆死庚申張輔敗賊于賊子闢甲子繁峙進
嘉禾趙疇請表賀帝曰近蘇松水患未息保定浙東
皆兩甯渾河決固安謂禎祥朕德所致災異非朕所
致乎爾等宜助朕修德他非所聞也九月庚午朔日
有食之封甘肅總兵官左都督何福為寧遠侯張輔
敗賊於太平海口辛未湘潭妖賊李法良伏誅丙子
武安侯鄭亨率師巡邊冬十一月戊寅張輔軍獲簡
定於美良送京師誅之十二月庚戌命濟寧至良鄉
民頻年遞運者賜田租一年辛亥進封陳懋寧陽侯
乙丑召張輔還